



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

22 Jullu 2012

Sekretáriu Jerál Parlamentu konsidera Prezensa JSMP Importante iha Parlamentu Nasionál

Iha 19 Abril 2013, Unidade Programa Observasaun Parlamentár (POP) JSMP halo audiénsia ho Sekretáriu Jerál (SEKJEN) Parlamentu Nasionál iha Uma Fukun Parlamentu Nasionál (PN), Díli.

Audiénsia ne'e ho objetivu atu introdús servisu JSMP nian, liu-liu POP ne'ebé durante ne'e tau-matan ba atividade PN iha Plenária nomos Komisaun A. Kestaun ne'ebé JSMP foti iha audiénsia ne'e kona-ba asesu ba dokumentu no informasaun iha Sekretariádu Parlamentu nian, website Parlamentu no meu komunikaun no desiminasau informasaun seluk hanesan rádiu no televizaun.

JSMP observa katak públiku durante ne'e la dun asiste no hatene servisu PN nian tanba la iha meu komunikaun sira ne'e. Kestaun importante seluk mak kona-ba lian Portugés ne'ebé sai nu'udar obstáculos boot ba públiku no membru deputadu sira rasik atu asesu ba lei no ezbosu lei sira, nune'e halo deputadu balun la dun ativu no produtivu.

“JSMP espera katak SEKJEN foun ne'e bele konsidera asuntu sira ne'ebé JSMP foti ne'e hodi bele hadi'a sistema no funsionamentu servisu Sekretariádu PN nian iha futuru atu bele fasilita servisu PN no asesu públiku nian ba dokumentu no informasaun sira”, dehan Diretór Ezekutivu JSMP, Luis de Oliveira Sampaio.

Iha parte seluk, SEKJEN PN, Sr. Mateus Ximenes Belo ho kontente simu equipa POP-JSMP no apresia ideas no preokupasaun sira JSMP nian ne'ebé konsidera mós hanesan ajenda prinsipal iha ninia mandatu. Nia mós haktuir katak sei esforsu hodi hadi'a liu tan asuntu hirak ne'ebé JSMP hato'o, atu fasilita di'ak liu tan públiku nia asesu ba iha informasaun no dokumentu sira.

Relasiona ho asuntu lian Portugés, nia dehan Sekretariadu rekruta ona pesoál ida ne'ebé sei fokus atu halo tradusaun ba dokumentu sira inklui materia diskursu ofisiál sira hosi Portugés baTetun.

Liu tan, SEKJEN husu no enkoraza nafatin JSMP atu kontinua halo públikasaun sira iha jornál kona-ba grafiku komparaun prezensa membru parlamentu sira iha plenária no renuniaun komisaun nian, nune'e públiku bele hatene membru parlamentu sira nia servisu.

Enkontru ne'e taka ho entrega relatóriu JSMP nian kona-ba progresu servisu membru parlamentu nian hosi tinan 2011 too 2012 inklui relatóriu *Observasaun Jerál Setor Justisa 2012 no Relatóriu Institusionál JSMP 2012.*

Atu hetan tan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl